



## Terenga 4: Hōtaka 21 - 'mea'

### He Mihi

Kei ngā rauawaawa o tō tātou waka, whakakukū mai ki te hōtaka o Ako kia whakanakonako ai tātou i ā tātou kōrero.

### Hei Mahi Whakarongo

Kua tahuri tonu ki te whakarongo ki ngā whakamārama a Ruia Aperahama mō tētehi whakataukī hei ārahi i te tamariki. Anei ngā pātai hei whakautu mā koutou:

1. He aha tā Ruia whakapae?
2. He aha te turi kerekere?
3. Rangona ai te whakataukī nei i ngā horopaki ōkawa anahe?

### He Whakamārama

Kia tirohia i konei ngā whakamahinga rerekē o te kupu 'mea'.

- i. Ka mea<sup>1</sup> atu au ki a Mea<sup>2</sup> kia meatia<sup>3</sup> ngā mea<sup>4</sup> katoa ki mea<sup>5</sup> wāhi.
  1. mea = kī = kōrero
  2. Mea = e whakakapi ana te kupu 'Mea' i te wāhi ki te ingoa o te tangata
  3. meatia = e whakakapi ana te kupu 'mea' i te wāhi ki te kupu mahi
  4. mea = tētehi taputapu
  5. mea wāhi = tētehi wāhi kāore i āta whakamāramahia
- ii. E mea ana koe! = Kei te whakaae rawa atu au ki tāu.
- iii. E mea ana au, kāore ō take. = E kī ana au, kāore ō take.
- iv. E mea ana au ki te haere āpōpō. = E whakarite ana/E whakaaro ana au ki te haere āpōpō.

### Hei Mahi

**Whakamāoritā ngā rerenga e whai ake nei. Whakamahia te kupu 'mea' i roto i ō whakamāoritanga:**

1. I intend to sell the house next year.
2. We're thinking of going to Tahiti for a holiday.
3. They plan to revive the tradition.
4. Put the thingy-me-jig on.
5. Am I going? You bet!

### Whakautu:

1. E mea ana au ki te hoko atu i te whare ā tērā tau.
2. E mea ana mātou ki te haere ki Tahiti, ki te hararei.
3. E mea ana rātou ki te whakaora i te tikanga rā.
4. Whakakāngia te mea nā.
5. E haere ana au? E mea ana koe!